



INTRODUCZIUN

DA MARIA CRISTINA DERUNGS-BARTOLOMEI

Oz prevala silla dumengia la solemnità de sogn Gion Battesta, ina dellas ca. 20 fiastas principalas digl onn liturgic. Sulettamein dad el vegn festivada la naschientscha, sco per Niessegner e per Maria. Quei muossa la muntada tut speciala de quella persuna ella veta sezza de Jesus e della Baselgia. Igl evangelist Lucas ha mess quei en evidenza cun grond inschign litterar. El ha baghegiu si in raquent cun parallelas: l'annunziaziun a Zaharias e quella a Maria; la naschientscha de Gion e quella de Jesus. Tut en in raffinau ritmus dil temps che la Baselgia repeta aschia: Gion Battesta nescha el mument ch'il sulegl entscheiva a prender giu, ferton che Jesus nescha sis meins pli tard, cura ch'il sulegl entscheiva e crescher, ual sco Gion Battesta di: «El [Jesus] sto crescher; mo jeu stoi vegnir dil meins» (Gn 3,30). Gion Battesta va ordavon al Segner, ei siu «pot», prepara la via agl evangeli. Quei ei la vocaziun apostolica della Baselgia e de mintga cristifideivel. Mo tut quei stat en negina proporziun cul dun che vegn encunter a nus: la purschida dil Reginavel de Diu. Igl ir ordavon fuss nuot, sch'ei muncass igl ir suenter, il suandar Jesus, senza prender scandal della humilitonza de sia realitad humana e dellas pretensiuns che sia annunzia cumporta.

EVANGELI

Lc 1,57–66.80

⁵⁷Per Elisabet ei il temps da parturir secumplenius, ed ella ha parturiu in feagl. ⁵⁸Ses vischins e parents han enderschiu ch'il Segner hagi fatg gronda misericordia cun ella, ed els ein selegrai cun ella.

⁵⁹Ed igl otgavel di ein els vegni per surtagliar igl affon. Ins leva numnar el Zaharias sco siu bab. ⁶⁰Mo sia mumma ha priu il plaid e detg: Na, siu num duei esser Gion! ⁶¹Cheu han ins rispundiu ad ella: Negin da tia parentella ha num aschia. ⁶²Ed ins ha cun segns emparau siu bab, co el vegli ch'ins detti num ad el. ⁶³El ha fatg dar ina tabla ed ha scret: Gion ei siu num. E tuts ein sesmarvigliai. ⁶⁴En quei mument ei sia bucca s'aviarta e sia lieunga sesligiada, ed el ha plidau e ludau Diu. ⁶⁵Tut ils vischins ein stai surpri da tema, ed ell'entira muntogna dalla Giudea risdav'ins da tut quels eveniments. ⁶⁶Tut tgi che udeva quei, prendeva a cor ei e scheva: Tgei vegn ei pomai a dar ord quei affon? Pilver, il maun dil Segner era cun el.

⁸⁰Igl affon denton carscheva e vegneva ferm da spért. Ed el ei vivius el desiart, tochen il di ch'el ei semussaus avon Israel.